

STJÓRNARTÍÐINDI B 13 – 1991

20. mars 1991

261

Nr. 119

AUGLÝSING

um framlagningu kjörskráa við alþingiskosningar 20. apríl 1991.

Samkvæmt heimild í 1. mgr. 23. gr. laga um kosningar til Alþingis, nr. 80 16. október 1987, er hér með ákveðið að sveitarstjórnir skuli hafa lagt fram kjörskrár vegna alþingiskosninga er fram eiga að fara 20. apríl 1991 eigi síðar en þriðjudaginn 2. apríl 1991.

Jafnframt er ákveðið að frestur til að afhenda sveitarstjórn kærú vegna kjörskrár renni út kl. 12 á hádegi þriðjudaginn 9. apríl 1991 og að sveitarstjórn skuli hafa skorið úr aðfinnslum við kjörskrána eigi síðar en mánudaginn 15. apríl 1991.

Þetta birtist hér með til eftirbreytni öllum þeim sem hlut eiga að máli.

Dóms- og kirkjumálaráðuneytið, 20. mars 1991.

Óli Þ. Guðbjartsson.

Ólafur W. Stefánsson.

20. mars 1991

Nr. 120

LEIÐBEININGAR

um utankjörfundaratkvæðagreiðslu sjúkra o.fl.

I. Um atkvæðagreiðslu á stofnunum.

1. gr.

Samkvæmt 2. mgr. 63. gr. laga um kosningar til Alþingis er utankjörfundarkjörstjóra innan lands heimilt að láta kosningu fara fram á sjúkrahúsi, dvalarheimili aldraðra eða stofnun fyrir fatlaða, enda sé kjósandi til meðferðar á hlutaðeigandi stofnun eða vistmaður þar. Með sama hætti fer um fangelsi og vistmenn þar.

2. gr.

Rétt til að greiða atkvæði utan kjörfundar á stofnunum þessum hafa eingöngu þeir sem dveljast þar og eru þar til meðferðar eða eru vistmenn þar. Aðrir, svo sem starfslíð stofnananna, hafa hins vegar ekki rétt til að greiða þar atkvæði.

3. gr.

Kjörstjóri skal ákveða, að höfðu samráði við stjórn hlutaðeigandi stofnunar og að fengnum upplýsingum um þá sem þar eru til meðferðar eða eru þar vistmenn, hvort ástæða sé til að láta atkvæðagreiðslu fara þar fram og þá hvenær.

Ákvörðun um þetta efni skal tekin eigi síðar en sjö dögum fyrir kjördag og skal þá birta auglýsingu innan hlutaðeigandi stofnunar um það hvar atkvæðagreiðslan fer fram og á hvaða tíma. Jafnframt skal tilkynna umboðsmönnum framboðslista um atkvæðagreiðsluna fyrirfram.

Að jafnaði myndi nægilegt að atkvæðagreiðsla fari fram einn dag í hverri stofnun, í nokkrar klukkustundir, eftir fjölda þeirra sem rétt mundu eiga á að greiða atkvæði utan kjörfundar á stofnuninni.

4. gr.

Nauðsynlegt er að hlutaðeigandi stofnun láti í té aðstoðu, þ. á m. hentugt húsnæði fyrir kjörstað, svo og eftir atvikum aðstoðarfólk, til þess að atkvæðagreiðsla geti farið fram með fyrirskipuðum hætti. Rétt er að undirstrika að kjósanda ber að koma á fund kjörstjóra þar sem atkvæðagreiðslan fer fram og að atkvæðagreiðsla má eigi fara fram í sjúkrastofum eða herbergjum vistmanna nema verulegir annmarkar séu á að flytja kjósanda á fund kjörstjóra.

II. Um atkvæðagreiðslu í heimahúsum.

5. gr.

Samkvæmt 3. mgr. 63. gr. kosningalaga getur utankjörfundarkjörstjóri innan lands heimilað kjósanda, sem ekki getur sótt kjörfund á kjördegi vegna sjúkdóms, fötlunar eða barnsburðar, að greiða atkvæði í heimahúsi.

6. gr.

Ósk um að greiða atkvæði í heimahúsi skal vera skrifleg á þar til gerðu eyðublaði, sem kjörstjóri lætur í té, og studd vottorði læknis. Skal umsóknin hafa borist kjörstjóra eigi síðar en kl. 12 á hádegi þann dag þegar ein vika er til kjördags.

7. gr.

Kjörstjóri getur í sinn stað tilnefnt sem utankjörfundarkjörstjóra tvo trúnaðarmenn til að sjá um framkvæmd atkvæðagreiðslunnar hjá kjósanda. Um þá framkvæmd fer að öðru leyti eins og um kosningu hjá kjörstjóra.

III. Almenn ákvæði.

8. gr.

Atkvæðagreiðsla samkvæmt 2. og 3. mgr. 63. gr. kosningalaga má ekki fara fram fyrir en þremur vikum fyrir kjördag.

9. gr.

Um kosninguna eiga að öðru leyti við ákvæði 62. gr. kosningalaga. Samkvæmt því hefur kjósandi heimild til að greiða atkvæði utan kjörfundar, ef hann gerir ráð fyrir því að hann geti ekki vegna fjarveru eða af öðrum ástæðum sótt kjörfund á kjördegi á þeim stað þar sem hann er á kjörskrá.

Um kosningaathöfnina sjálfa þ. á m. um heimild til að veita kjósanda aðstoð, gilda að öllu leyti sömu reglur og um utankjörfundaratkvæðagreiðslu almennt, sbr., einkum 65. og 66. gr. kosningalaga. Aðstoð má þannig því aðeins veita að kjósandi sé ekki fær um að kjósa á fyrirskipaðan hátt sakir sjónleysis eða þess að honum sé höndin ónothæf. Óheimilt er með öllu að bjóða þeim aðstoð sem þannig þarfnast hjálpar.

10. gr.

Leiðbeiningar þessar sem settar eru samkvæmt 5. mgr. 63. gr. laga um kosningar til Alþingis, nr. 80 16. október 1987, sbr. lög nr. 10 19. mars 1991, öðlast þegar gildi.

Jafnframt falla úr gildi leiðbeiningar um utankjörfundaratkvæðagreiðslu á sjúkrahúsum og dvalarheimilum aldraðra, nr. 121 23. mars 1987.

Dóms- og kirkjumálaráðuneytið, 20. mars 1991.

F. h. r.

Ólafur W. Stefánsson.Jón Thors.

15. mars 1991

Nr. 121

REGLUGERÐ

um breyting á reglugerð nr. 327/1990, um tollafgreiðslu hraðsendinga.

1. gr.

2. mgr. 4. gr. reglugerðarinnar orðist svo:

Flutningsmiðlari ákveður fjárhæð ábyrgðar sem jafnframt er hámark þeirrar fjárhæðar aðflutningsgjalda sem gjaldfrestur er veittur á innan hvers uppgjörstímabils, sbr. 9. gr. Telji tollstjóri ábyrgðarfjárhæð ófullnægjandi má hann ákveða lágmark hennar. Ábyrgð skal vera ótímabundin og uppsegjanleg af hálfu ábyrgðaraðila með ábyrgðarbréfi til viðkomandi tollstjóra. Uppsögn ábyrgðar tekur ekki gildi fyrir en tollstjóri hefur staðfest skriflega að henni hafi verið veitt viðtaka. Uppsögn breytir hvorki ábyrgð varðandi aðflutningsgjöld sem greiðslufrestur hefur verið veittur á fyrir gildistöku ábyrgðar né ábyrgð á greiðslu dráttarvaxta viðurlaga eða annars kostnaðar. Eftir gildistöku uppsagnar ábyrgðar er tollstjóra óheimilt að tollafgreiða hraðsendingar til viðkomandi flutningsmiðlara samkvæmt reglugerð þessari.

2. gr.

Í stað 2. másl. 1. mgr. 6. gr. reglugerðarinnar komi:

Við afhendingu hraðsendinga skal flutningsmiðlari afhenda tollgæslunni flugfarmbréf svo og undirfarmskrá þar sem m.a. skal veita upplýsingar um verðmæti, tegund og þyngd vöru. Ríkistollstjóri getur sett nánari fyrirmæli um gerð eyðublaðs fyrir undirfarmskrá og frekari upplýsingar sem þar skulu veittar. Ákvæði tollalaga nr. 55/1987, með áorðnum breytingum, m.a. um aðflutningsskýrslur og aðrar skýrslugjafir gilda eftir því sem við getur átt um eyðublaðið og upplýsingar sem þar eru veittar.

3. gr.

1. másl. 4. mgr. 6. gr. reglugerðarinnar orðist svo:

Vanti ofangreind tollskjöl eða þeim er í einhverju ábótavant með tilliti til hraðsendingarinnar í heild eða að hluta getur tollgæslan neitað um afhendingu á þeim hluta sendingarinnar sem ábótavant er þar til úr hefur verið bætt, enda sé það gert innan viðkomandi uppgjörstímabils, sbr. 9. gr. Að uppgjörstíma liðnum verður viðkomandi sending að hafa hlotið fullnaðarafgreiðslu áður en afhending er heimiluð.